

【避暑】葉美伶原作

鳳凰樹榮榮个、細細个花開到鬧熱煎煎，日頭緊來緊烈，人在樹下向往上睺，分佢晟到擘毋開目，不時聽得著樹頂个蟬仔大聲喊知咧～知咧～知咧～，放勢牯唱等這季節正會有个歌曲。

逐年這下係佢最樂暢个時節！等學期結束，放寮該下，阿爸會送佢轉莊下摺講客个阿公、阿嬪培養感情。戴在莊下無冷氣，毋過，闊闊个瓦屋當涼，若係暗晡頭特別熱个時節，阿嬪就會擎支扇仔摺佢撥涼，撥啊撥啊，毋多知佢就睡忒咧。老屋面前有一隻盡大个禾埕，阿嬪講頭擺係炙穀用个，這下穀收成直接載去穀倉焙，毋使日頭炙，也毋驚下晝頭个風時雨。阿嬪講著頭擺該艱苦个日仔，成時還會偷偷仔掙目汁。這下禾埕已經變成停車場，下把仔¹係炙菜脯摺鹹菜乾个好所在，也係佢兜細人伴个遊樂場。

大門口種有一頭蓮霧樹，總係打到結結結，歸樹頂纜纜懸懸。逐年到這時節就像摺佢講：「歡迎光臨，佢為著你煞猛打子，就像阿公、阿嬪心肝肚捻捻个愛，望等子孫轉來樣。」屋面前還有一條圳溝，歸日泉水流流流流，這下還捉得著蝦公，阿嬪

講，就算係天早也毋怕，泉水分佢个恩情佢愛知好惜。在烈烈日頭下最清涼个享受係泗水、覓蜆仔、捉蝦公、爽水相戽，在收成後个田肚燴番薯、爽騎馬打戰、份家啦，佢這兜細人伴全部爽到歡喜露天，這也係佢避暑个快樂生活。

一瞞目，佢讀小學三年生咧，阿姆安排佢在避暑去補習。逐日關在冷氣間肚，歸隻人像拉絛²个弓，身材變到又高又瘦，也變到過較白淨，歸日就像極樂仔挨無停，佢想著阿公、阿嬪个莊下，想著蓮霧還等等佢去摘，想著隔壁鄰舍个細人伴還等佢共下去爽園人尋。

阿爸講佢俚客家人最重要个兩件事：耕種摺讀書。所以正有人講「晴耕雨讀」，愛出頭天，讀書第一重要。毋過，阿爸也會輒輒撫下時間，載全家大細轉去睺阿公、阿嬪。其實，佢最毋盼得个係無法度逐日聽著阿公、阿嬪講古，還有該好聽个客家話。

¹ 下把仔：音 ha' ba' er'；有時候。

² 絛：音 hen；緊。

【鬧熱个落雨天】曾菁怡原作

鬧鐘鈴¹！鈴！鈴響咧！大嫲聲喊佢遽遽跣起來，再過勒床就會赴毋掣去學校讀書咧。佢目絲絲伸手掀忒鬧鐘，過橫轉舒適个眠床，毋盼得摺佢分開。咦！毋係天光咧？外背仰會還係暗摸胥疏？探頭睨啊出去，原來係天公派烏雲使者來通知佢兜——愛落雨咧！

有人認為落雨天盡麻煩，出門愛著水衣，無就擎遮仔，無細義衫褲又會搵到濕落落，愛去哪位就無方便。學生仔最惱無法度出去打球、爽寮，一下課先生就掌等，麼人都做毋得出去逐雨，所以見堵著落雨，大家就唉唉唧唧，目盯盯睨等雨水占去歸隻運動坪，實在還慍悴唷！

但係，落雨天對佢來講顛倒係異鬧熱个日仔。晨早一出門，滿街路就係淦淦个車仔，這片嘩嘩；該片叭叭，像久違个朋友互相打招呼，大家尖共下講起恁久無見个思念。該兜行路个人，擎等遮仔比比擎像一列花，雨水一滋潤，就開出五彩个花蕊，行來行去像比麼人个花較靚樣。你係聽較真兜仔，該雨水打在車頂、

屋頂、水窟、也係樹葉頂高个聲音全部無共樣，有高、有低、有大聲、有細聲，像係唱歌分你聽樣。有成時，雷公還會用躡燼來打燈光，用響雷來伴奏，你講，恁樣係毋係異心色呢？

佢最愛在落雨天打早就去學校，因為該兜平常時圓核核个蜷螺、蟲蟻全部都會趟出來爽水。學校个圍牆係膏紅毛泥个，泥壁頂个溜苔青里里，落雨該下，蜷螺爬上爬下陣打陣，相賽哩麼儕爬較遽，有个彎來幹去做起畫圖个藝術家，有个停跔在圍牆頂高享受逐雨个清涼，逍遙自在。

落雨天出來爽寮个蟲蟻最好膽，衫褲無著就緊搖搖仔出來爽水，溝壩肚朗朗滾个水流異刺激，幾尾蟲蟻分水冲啊去還會搖來搖去，暢到奈毋得。有个蟲蟻大犖犖仔趟到路町來，較砸身个還做得趟轉去；較嫚个將就橫在路徑頭，分天公做主咧！

鬧熱个落雨天，有人懊惱，有人歡喜，天公無法度分逐儕納意，唯一係佢俚做得自家改變想法，恁樣，不管麼个天都係最好个天。

¹ 鈴：音 liang；擬聲字。模擬鈴聲。

編號 3 號

【阿姆个鹹糜】黃旭霞原作

起屋个師傅摶做小工个叔姆在禾埕町無閒直掣。師傅交代叔姆愛摶磚仔淋濕來，起屋時正好用，阿姆脛叔姆在該攪沙仔無閒，就走去拉水管來浴磚仔，佢就跔等阿姆在旁脣爽水。

阿爸上班無法度長透轉屋下，屋下大細事情全部係阿姆一儕揸在肩頭頂做到兩頭烏，佢兜毋知頭天个三兄妹，想著會有新屋好戴、有自家个間肚好歇，心肝肚不時園等歡喜个心情。成時阿姆喊來搵手搬磚仔、疊磚仔、攞水、攞茶……，佢摶兩個阿哥定著會去搵手。

有一日，下晝兩點零，阿姆在灶下無閒，耳空聽著阿姆提菜刀、切豬肉、香菇、芹菜……洗鑊嫲、開瓦斯……，哇！阿姆愛開始煮點心咧！佢恬恬揸去灶下脛阿姆煮點心。阿姆在豬油盞先挖兜豬油放落鑊肚，續等放浸過水个蝦米摶香菇在該焗香，炒出香味過後就放切好个竹筍，炒一下仔就放洗淨个米共下炒，浸過蝦米摶香菇个水也做毋得打爽，漕滴豆油後就漕兜滾水開始煮糜咧！差毋多半點零鐘糜就煮好咧，毋過糜忒燒，阿姆又摶歸鑊个

糜兜到大面盆裡肚沾水¹，分糜較遽冷。

「阿霞！搵手提碗箸放到禾埕个矮桌頂。」

等碗箸排好，阿姆就喊佢兜三兄妹落去旁脣个矮屋肚爽。阿姆講：「師傅食點心，細人仔毋好坐在旁脣脛人食，恁樣無禮貌。」走落屋肚，佢提細凳頭來墊腳，從細窗門偷脛師傅佢兜食點心，老師傅添第三碗，做小工个叔姆也添第二碗，佢心肝肚當急，肚屎咕嚕咕嚕个聲也毋會輸人。阿姆煮該恁大鑊个鹹糜就會無咧！佢个嘴毋知幾時翹到半天高。

佢遽遽走去灶下，該央時阿姆去收該伸無兩碗个鹹糜，阿姆喊佢去搵手收碗箸，佢毋甘願慢慢仔行、慢慢仔做，碗箸放轉灶下準備愛走咧！阿姆講：「去提碗來張。」原來阿姆煮好鹹糜，早就有留便分三個細人仔食个額。

佢遽遽提碗去張糜，這下無赴顧該下發闊个面子咧！鼻空摶嘴愛開始無閒囉！

一碗好食个鹹糜，有香菇、蝦米、竹筍、瘦肉、芹菜，最重要个係還有阿姆惜子女个心。細細个時節佢食毋出來，這下自家做阿姆咧！正知得感受這一碗鹹糜个好味道！

¹ 沾水：音 dem^ˇ fi^ˋ；把物品微微浸泡於水面上。

編號 4 號

【阿公个杭菊】黃麗芬原作

毋知對哪久開始，阿公逐日就在該等天光。

一天光，阿公緊拚拚仔就想愛出門，像赴等去約會樣仔恁歡喜。佢成時用行个，成時騎自行車，就好滿哪仔緊行。佢毋會像別人逐晨早在 LINE 群組傳貼圖問早，淨去廟肚拜神、在廟前个大樹下睭人行棋就算有打卡報到咧。佢最尾一站係在阿嬤最好去个菊花田町坐等睭花、睭樹、睭人、睭鳥仔，恬恬做無聲个交流，睭過願咧自然就會轉屋，這係佢簡單生活个快樂。

有一日，到臨暗仔阿公還吉轉屋，這係從來都毋識發生个事。歸屋下人緊張到無結無煞歸莊頭去尋，落尾¹正在菊花田町尋著。阿公哪知佢兜有幾愁慮，嗶毛蟹懸頸——尋無頭緇²緊問：「菊花仰做下無咧？」毋管佢兜仰般應佢，佢就係毋信，淨會閩孜孜³緊罵講：「恁花蓼！恁花蓼！」原來，心愛个東西毋見忒時，理智線也會斷忒。

¹ 落尾：音 lab` mui`；最後。

² 毛蟹懸頸——尋無頭緇：音 mo` he` vien` giang`—cim mo teu tag`；懸頸，指的是上吊。尋無頭緇，指找不到頭的部分綑綁，引申為做事找不到重點，摸不著頭緒。

³ 閩孜孜：音 ad` zii` zii` er`；形容生氣的樣子。

「阿公，你睭！阿嬤摺菊花——兩蕊花。」一轉到屋下，佢煞煞去阿公个間房提出佢放在拖箱个相片，這係佢摺阿嬤兩儕在銅鑼九湖个菊花田肚翕个，乜係佢兩子阿公个祕密。這張相片雖然有兜仔褪色，還係睭得清楚滿田坵个菊花一蕊一蕊，有白乜有黃，佢兜个笑容摺大自然个靚各有錫人个所在，無想著這嗰係阿嬤過身後阿公唯一个回憶摺紀念。佢心肝肚知：「『情字這條路』个歌仔，阿公係仰般唱都唱毋會煞咧……。」

對該日起勢，佢兜胚想阿公交著一個新朋友，安到——「阿茲海默⁴先生」。佢毋知係對哪位來个，三不五時就會來尋阿公，來个時節都會帶等記憶个摔仔做等路送分阿公，大埕、細埕、麼个形仔都有。佢兩儕共下个時間漸漸仔變長，緊來緊鬥搭，阿公毋係奈到毋知好轉屋，就係買咧一千擔共樣共樣个東西轉來，還會倒去倒轉緊尋：「阿嬤呢？」恁樣个情況實在分人愁慮，所以佢兜準備一隻胸章結在阿公个面衫頂，胸章面頂高寫等阿公个名仔摺屋下个電話號碼，續等詐意摺阿公講：「恁樣，阿嬤就會摺你共下去睭花咧！」真真假假，有夢最靚，希望相隨。

總會天光个！佢兜會摺最遠个距離——「想念」拉兼來，摺最靚个記憶——「阿嬤」好好囤在心肝肚。

⁴ 阿茲海默：音 a` zii` hoi` med；阿茲海默症(Alzheimer's disease)。

【蘋果】徐姿華原作

在臺灣，蘋果¹毋係幾見奇个水果，一年四季儘採哪隻水果攤都睭得著，毋過，蘋果个魔力，係從細斯深深種在佢个心肝肚、囡入佢个腦膈肚个。

佢兜三姊妹一個續等一個出世了後，屋下个開銷日見日增加，阿爸摺阿姆參詳了後，佢決定放忒屋下該垵出益無多个薄田，出外食頭路，為著賺較多兜錢，阿爸去應²著水壩工程个十輪牯運轉手，愛配合工地時間出車，一個月正有好歇睏兩日仔定定。

阿爸當珍惜摺屋下人共下个時間，放寮前一日下班咧，阿爸斯透夜趕轉來，轉到屋下既經轉點咧，佢兜早都睡到屎肫孔孔，阿爸會輕手輕腳來間肚巡佢兜，睭有睡好無？有踢被無？佢會摺睡到橫架直架个佢兜拗起來睡正、過摺佢兜揞被，還會咬佢兜个面頰卵，分阿爸短短个鬍鬚刺著，又癢又疾又虐削，目睡覺分阿爸吵醒現起雷追³，目摸目罉嚶嚶滾⁴唸眇，阿姆斯會嚶嚶滾⁵，喊佢

莫撼射人，阿爸會牙牙蛇蛇⁶講：「恁久無睭著咧，當想佢个心肝妹啊！」還當愛睡个佢，一下又迷迷糊糊睡咧，毋過睡夢中仰會鼻著香香甜甜當好鼻个味緒呢？

第二日晨早跣起，枕頭脣有一粒又紅又大个蘋果，該香香个氣味斯係昨暗晡目睡覺鼻著个，該大蘋果還錫人哪！係阿爸轉來咧！佢一想真，遽遽跳下眠床，盲赴著鞋斯颯等出去，阿爸坐在飯桌前牙噉噉⁷睭等佢，佢一下就跳到阿爸个大腳髀面坐等，兩隻手纏等阿爸个頸根，摺阿爸使妮⁸。阿姆兜等一鑊燒燒个糜行過來，睭著恁樣笑笑仔講：「還使妮哦！遽遽去洗嘴洗面，好食朝咧！」佢還係毋肯下來，箝核阿爸像一隻無尾熊，阿爸笑到哈哈滾，企跣起來摺佢掬去洗浴堂洗嘴洗面。

阿爸知佢好食蘋果，逐擺做事轉來，總會買蘋果放在佢个枕頭脣，分佢做得發一隻香香甜甜个夢。佢知阿爸惜佢，佢也知佢當愛阿爸。該蘋果个香氣、靚靚个外型摺脆脆甜甜个好味緒，毋知從哪時既經刻入佢个心肝肚，該蘋果斯係阿爸愛佢、惜佢个印記。

¹ 蘋果：音 lin` goˇ；語源於日語「林檎(りんご)」。

² 應：音 rhin`；允諾。

³ 起雷追：音 hi` lui duiˇ；孩童使性子。

⁴ 嚶嚶滾：音 e e gun`；幼童哭鬧的聲音。

⁵ 嚶嚶滾：音 giau giau gun`；形容抱怨或不滿的聲音，多用於罵人。

⁶ 牙牙蛇蛇：音 nga nga sha sha；不正經。

⁷ 牙噉噉：音 nga veˇ veˇ；笑嘻嘻的。

⁸ 使妮：音 sai nai；撒嬌。

【賣菜】謝惠如原作

記得讀三年生該下，屋下人多，食用乜多，阿姆除忒田事，還愛知理屋下人个三餐，所以利用屋側角該埕空地來種菜，種啊種仔，菜嘅多到食毋去，將就載去街路賣。

慢冬十月禾仔割忒後，一隻奈日，阿姆愛偌跔佢去搨賣菜，到菜市場个路脣，阿姆頓好自行車，將後斗疊到尖起來个角菜，下十過抓¹下來，吩咐偌在該掌等賣，無講橫無講直佢自家又隨載去街路迂迂轉賣咧，丟偌一個人在該呆呆，毋知愛仰結煞正好。

偌本成就面皮薄，見睭著毋識个人就會面紅濟炸，莫講愛喊人來買菜。無結無煞个偌，敗勢到頭犁犁，全毋敢臥起來睭人，好得隔壁賣番薯个老伯姆睭偌恁恬又畏羞，笑笑仔講：「細阿妹仔，毋使驚，你做你大聲喊賣菜，人家聽著就會掇轉來睭你賣麼个，無定著有佢想愛買个菜，鴨嫲嘴愛罔吮正有好食，來！偌喊分你聽：『來唷！來買番薯唷！好食个番薯，又粉又甜哦，包你食咧還會倒轉來買唷！』」聽著老伯姆个喊賣後，偌就作膽試喊：「來唷！來買菜喔！一抓十個銀定定。」正喊啊煞，一個阿

姨聽著，隨停下來買，還講偌恁乖、恁曉得。聽著佢个褒獎，偌暢到緊喊緊大聲，行過偌面前个人，十個有八個大體會頓恬下來，攞偌買菜，無幾久就賣忒咧，分偌試著賣菜一息都毋會難。

冬下頭日仔短，臨暗放學轉到屋下，鞋一脫、衫一換，隨走去菜園攞阿姆搨摘菜。暗晡頭食飽夜後，攞阿哥兩個人開始擇菜、秤菜，偌兜負責个事頭，除了將一頭一頭有黃葉攞燥葉个蓋²擘忒以外，還愛將有泥个菜蓋搗搗啊，整理清淨好勢後，一抓一抓秤分佢平重正緝起來。阿姆不時交代偌兜：「有東西好賣，斤兩定著愛罈，雖然正十箍八角，又乜係錢，秤頭就係路頭，毋好去蝕虧人。還有賣食个東西，自家愛敢食个正好提去賣人。」這兜話偌全記在心。

賣菜雖然係一種小生理，賺無麼个錢，也無麼个大學問，毋過對這擇菜、賣菜个過程裡肚，分偌學著當多做人做事个道理。

¹ 下十過抓：音 haˋ ship goˋ zaˋ；解下十多把。

² 蓋：音 habˋ；老菜葉、外葉。

110 年全國語文競賽客家語朗讀文章國小學生組（饒平腔）

編號 7 號

【像戇仔个天才】葉秋菊原作

「人不可貌相，海水不可斗量」用這句話來講阿明牯，實在盡對般¹。佢乜相信天公爺攞你關忒一扇門，定著會攞你打開另外一扇窗。

見擺佢兜愛重新分班該下，心情就像老鼠跌落米缸肚，一重歡喜一重愁，歡喜个係做得熟事新朋友，愁个係毋知會有牛頭馬叉攞佢分共班無？當記得開學該日，遠遠睺著一個手癟癟、腳跛跛个細俵仔行落教室肚，該個人頭臥臥，嘴弛弛²仔緊行緊笑，睺起來戇戇當當，佢胚佢怕係行毋著教室，愛去隔壁个資源班正著敢！。

該個細俵仔的對³坐在佢隔壁。先生特別紹介這個細俵仔，講佢安到張忠明，手腳毋方便，打幫坐佢脣頭个人，發揮同學愛，搵手照顧。張忠明？佢話著係當聰明，險險笑出聲來，一想著新个一年愛攞佢比比坐，面就孬忒⁴一半。佢頭側側偷睺佢，欸！生著白淨白淨算係異清秀个細俵仔，毋過，總係透日仔口涎水霑霑

汀汀⁵，攞頸根圍等該條脰弛仔⁶，汀到潦潦，分人睺著目汁就會跌出來，同情心在佢心肝肚慢慢翻轉，佢定定仔幹轉頭攞佢笑一下，佢試著佢異得人惜啊！

佢該班个綻剝頭⁷總係撩撩刁刁，奈冬瓜毋何，捉瓠仔來拊毛，睺忠明好欺負，就學佢行路孔孔翹翹个樣相，無就撚佢个屎肫，好性个阿明牯斯目瞞瞞仔任人搥射，佢一肚懊躁，當想行前去替佢出頭。

阿明牯當自重，攞大家共樣上課，共樣寫作業，斯寫字較食力，較慢板定定，學生仔該當愛做个本分，佢毋識懈怠過。有一日上數學，先生出一隻題目難過上天，佢頭那想到必乜想毋出來，大家都額結結仔無人曉，哪會胚著阿明牯竟然毋使兩分鐘就算出來。大家目珠睸到大嫲粒，焮鏢⁸講到鉢乜無人愛信，戇牯仰會變精咧呢？原來佢係一個天才啊，起先話著佢係戇仔个佢，敗勢到面紅濟炸，還想尋隻空鑽下去！

見想著爽到昏天暗地毋知頭天个佢兜，攞提等隨身聽恬恬聽英文，嘴町迪迪凸凸背出一大串英文單字个佢，自家就會面紅，實在爭天差地啊！人講：一枝草一點露，天公爺係公當个，雖然無分佢健全个膺身⁹，毋過有分佢聰明个頭腦、上進个心，在未來个路項，大家都毋使為佢煩惱、為佢愁咧。

¹ 對般：音 dui` ban`；契合、一致。

² 嘴弛弛：音 zhe` rhe` rhe`；嘴咧得開開的。

³ 的對：音 dag` dui`；正巧。

⁴ 孬忒：音 fe` ted`；歪了。

⁵ 霑霑汀汀：音 dam dam din` din`；形容液體不停的自物體上滴下來。

⁶ 脰弛仔：音 goi` rhe` er`；圍在脖子上的圍兜。

⁷ 綻剝頭：音 can` dog teu；罵人頑皮鬼。

⁸ 焮鏢：音 pu lo；用生鐵鑄的炊具。

⁹ 膺身：音 vu shin`；身軀，身體。

【秘密森林】林貴珠原作

佢從細盡好在山林肚、溪壩脣爽寮，一到放寮日就滿哪仔野上野下，爽到斷烏正轉屋，記得讀小學該下，總係好跣阿娥厥姆去美濃山下拈樵，阿娥厥爸盡早就過身咧，單淨倚恃厥姆做小工來畜歸屋大細，阿娥盡知人我，放寮日總係會跣厥姆去山肚拈樵相添，佢輒常揪衫尾，摺佢兜共下去山林肚遠寮，對佢來講，這山林肚全全係寶。

打早佢就背等飯包摺佢兜共下去，在山林肚佢兜爽園人尋，將這一大片个山林變做佢兜个運動坪躡上躡下¹，在樹頂爬上爬下無輸山猴仔，麼个愁慮早就飛走咧，飛到天斯無恁高，佢个心情就像著等靚靚花裙在該跳舞个蝶仔，飛上飛下恁樣自在、恁樣快樂，爽到汗流脈落就去山坑脣爽水，山坑水清又清、啱一口透心涼，坑水涼又甜，較贏雜貨店个枝仔冰。接等貶石頭捉蝦公、捉毛蟹、捉魚仔，唱等佢自家个山歌，快樂个歌聲跣等坑水傳遍歸隻山窩壩壁，流過莊頭，流到闊野野个天際。

有時膨尾鼠來做伴，佢个面頰卵蠕蠕動脛等佢兜手上个零

嗒，錫到佢个口涎水就會跌下來咧，盡得人惜，還有領領拜个山狗太，佢脛你，你脛佢，有時四腳惹天盡心色，行到笏竹頭下聽著唧唧个聲音，佢兜將手頂銅罐仔張湊个水灌入地泥个空肚，無幾久就脛著另外一隻空趲出土狗仔來，一隻、兩隻有時做得灌出三、四隻土狗仔，爽到慄咧，就坐在香絲樹下，山風柔柔吹過樹林，聽等土狗仔唧唧滾挨弦仔，山坑水摺笏竹和出大自然个樂曲，這係最錫人聽个樂曲。

暢樂个時間總係恬恬仔溜啊過，一矚目就到斷烏愛轉屋咧，猴嫲背等細猴仔攀籬懸壁愛轉寶，佢兜就踏等紅霞下山，貓頭鳥咕咕滾摺佢兜講「正來寮」，阿伯姆孩等滿滿个幸福，佢乜袋等湊湊个快樂轉來，感謝這座山林加添佢心色又無共樣个童年生活，感謝一路里來陪等佢成長个好山好水，對佢來講，爽上爽下毋當美濃山下，這係佢心肝肚最靚个秘密森林。

¹ 躡上躡下：音 lung` shong` lung` ha`；跑來跑去。